

共同經課 - 1 列王記上十七章八節~二十四節

8 耶和華的話臨到伊講：9 「你起來去到西頓的撒勒法，倚起佇遐；看啊，我已經命令彼所在一個守寡人養飼你。」10 伊就起來去撒勒法。到城門的時，抵當有一個守寡的人佇彼所在啲拾柴，以利亞就叫伊講：「求你用器具舀淡薄水來互我飲。」11 伊去舀的時，以利亞閣叫伊講：「請你順手提淡薄餅來互我！」12 婦仁人講：「我指永遠的耶和華——你的上帝來講，我無一個餅，只有一把仔麵粉佇桶裡，及淡薄油佇瓶裡；看啊，我拾二支柴，欲倒去為著我及我的子燻伊；阮通食伊，才死！」13 以利亞給伊講：「免驚！去啊！照你所講的來行。總是代先給我做一個細的餅帶來互我，然後為著你及你的子做伊。」14 因為耶和華——以色列的上帝按呢講：桶內的麵粉袂減少，瓶內的油袂了，到耶和華落雨佇地上的日。」15 婦仁人就去，照以利亞的話來行。婦仁人及伊的家，及以利亞食多多日。16 桶內的麵粉無減，瓶內的油無了，抵照耶和華託以利亞所講的話。17 諸個代誌了後，此個婦仁人就是彼家的主人，伊的子破病；病真傷重，致到伊無一條氣絲。18 婦仁人給以利亞講：「上帝的奴僕啊，我及你甚麼干涉？你來我遮互上帝記得我的罪，互我的子死啊？」19 以利亞給伊講：「將你的子交我。」以利亞就對婦仁人的胸前抱去，帶到所踎的樓，下佇家己的床，20 就求叫耶和華講：「耶和華——我的上帝啊，你豈閣降災禍佇我所及伊住的守寡人，害死伊的子啊？」21 以利亞就仆佇囡仔的身軀三擺，求耶和華講：「耶和華——我的上帝啊，求你互此個囡仔回魂！」22 耶和華聽以利亞的聲，囡仔的魂就復倒，伊就活。23 以利亞就抱彼個囡仔對樓頂落來，入厝交互伊的老母，以利亞講：「看啊，你的子活啦！」24 婦仁人對以利亞講：「今我知你是上帝的奴僕，你所講耶和華的話是真實。」

共同經課 - 2 詩篇一百四十六篇

1 恁著謳啞耶和華！我的心啊，你著謳啞耶和華！2 我一生欲謳啞耶和華！我猶活的時欲唱歌謳啞我的上帝！3 恁莫得倚靠君王，莫得倚靠世間人；in 一點仔袂會幫助。4 伊一下斷氣，就歸土；伊所計劃的，佇彼日就消滅。5 有雅各的上帝做伊的幫助，向望伊的上帝——耶和華的，此號人有福氣！6 伊是創造天、地、海，及其中的萬物；伊保守誠實，到佇永遠。7 伊為著受冤屈的人伸冤，賞賜食物互枵餓者。耶和華解放受關監者；8 耶和華開睛暝人的目矐；耶和華扶起受壓制的人。耶和華疼惜義人。9 耶和華保護出外人，扶持孤兒寡婦，獨獨歹人的道路互伊彎曲。10 耶和華欲做王，到永遠！錫安啊，你的上帝欲做王，到萬代！恁著謳啞耶和華！

共同經課 - 3 加拉太書一章十一節~二十四節

11 兄弟啊，我報恁知，論我平素所傳的福音彼個毋是照人的意思。12 因為我未曾對人受著，也無受人教示，是對耶穌基督的啓示。13 恁曾聽見我前佇猶太教所行做的，就是窘逐上帝的教會真珍來陷害伊。14 閣我佇猶太教，比本族同輩的多多入卡進步，為著我祖宗的遺傳閣卡熱心。15 若是對阮老母的胎分別我，用伊的恩典召我的上帝，16 既然歡喜將伊的子顯明佇我，欲互我宣傳伊佇外邦，我就無及人參詳，17 也無上耶路撒冷就近許個代先我做使徒的，獨獨去亞拉伯，閣倒轉來大馬色。18 三年後，我上耶路撒冷去探磯法，及伊住十五日。19 其餘的使徒，除去主的兄弟雅各以外，我攏無見著。20 今我所寫互恁的，我佇上帝的面前無白賊。21 後來我到敘利亞及基利家的地方。22 彼時，屬猶太地惦佇基督諸個教會猶久毋識我的面。23 in 干單聽見講前窘逐咱的，今傳伊平素所陷害的教。24 就因為我歸榮光上帝。

共同經課 - 4 路加福音七章十一節~十七節

11 閣無恁久，耶穌去一個城，名叫拿因，伊的學生及歸陣人及伊同行。12 欲近城門，抵當有人扛一個死人出來。伊的老母孤孤生此個子；閣是守寡。城內有多多入啲送伊。13 主看見就憐憫伊，給伊講：「莫得喙！」14 就倚去摸彼個靠身屍的架，扛的人停腳。伊就講：「少年人啊，我給你講，起來！」15 死的人就起來坐，續講話。16 耶穌就將伊互伊的老母。眾人攏驚惶，歸榮光上帝，講：「大先知有興起佇咱中間！」閣講：「上帝有看顧伊的百姓！」17 對按呢耶穌此個名聲遍傳佇猶太及周圍的地方。